

Svečanost u Kalinoviku



Novootvorena džamija u Ulogu

Otvorena obnovljena džamija u Ulogu

KALINOVIK - Na radost brojnih vjernika u subotu je svečano otvorena obnovljena džamija u mjestu Ulog, 20 kilometara od Kalinovika, čiju su rekonstrukciju novčano pomogli mještani te općine trenutno nastanjeni diljem BiH i svijeta, te mnogi drugi donatori.

Džamiju je, uz prigodnu dovu, svečano otvorio vakif **Ahmed Spahić**. Jedan od inicijatora gradnje džamije u tom kraju **Šaćir Čano** kazao je kako je procedura prukupljanja dokumentacije i sredstava, uključujući i radove, trajala osam mjeseci.

Otvaranju džamije prisustvo-

vao je i načelnik Opštine Kalinovik **Slavko Sladoje**, koji je izrazio zadovoljstvo tim događajem.

“Drago mi je što je rekonstrukcija džamije tekla bez problema, posebno jer se desila u predizbornoj godini kada ponekad i tenzije možda učine svoje, ali kod razumnih ljudi to ne može doći do izražaja”, kazao je Sladoje.

Sarajevski muftija **Husein efendija Smajić** naglasio je da je otvaranje džamije najljepši poklon Bošnjacima u tom kraju koji, iako prognani s kućnog praga, žele se vratiti u Kalinovik.

E. Ag.

BOSS kritizira rad bh. sudova

Sudije i tužioci sve češće zloupotrebljavaju položaj

Kandidat Patriotskog bloka Bosanske stranke (BOSS) - Socijaldemokratske unije (SDU) BiH za Parlament Federacije BiH **Faruk Balijagić** izjavio je da “sve veći broj afera u pravosuđu pokazuje da su u bh. sudove i tužilaštva instalirani kadrovi koji nisu u stanju časno i prema zakonu obavljati povjerene funkcije”.

“Učestali dokazi o zloupotrebama položaja sudija i tužilaca

ukazuju na to da je tzv. reforma sudstva promašena i pogubna, posebno za Bošnjake”, rekao je on.

“Bezakonje i samovolja u bh. pravosuđu zahtijevaju vraćanje pravosuđa pod kontrolu naroda, te ukidanje Visokog sudskog i tužilačkog vijeća (VSTV) BiH, koje je postalo servis antibošnjački nastrojenih stranih obavještajnih službi”, kazao je Balijagić, saopćeno je iz BOSS-a.

Plemeniti gest anonimnog Semberca iz SAD

Djeci poginulih boraca 5.000 dolara

BIJELJINA - Donator iz SAD, porijeklom iz Semberije, koji je želio ostati anoniman, podijelio je u Bijeljini novčanu pomoć djeci poginulih boraca. Stotinu osnovaca i srednjoškolaca, koji su dobili po 50 dolara, iskoristiće novac, kažu, za nabavku udžbenika i školskog pribora.

“Za mene ova pomoć ima vrlo veliki značaj u materijalnom, ali i u duhovnom smislu jer sada znam da

neko ipak misli na nas i da će nam pomoći”, kazala nam **Svetlana Gavrilović** koja je završila osmi razred.

Djeca poginulih boraca dobila su ovog mjeseca i od opštinske uprave po 200 KM za nabavku udžbenika. Pomoć su dobila djeca poginulih boraca lošijeg imovinskog stanja koja nisu bila na besplatnom ljetovanju, niti su dobijala novčanu pomoć u proteklom periodu.

V. Du.

Predizborna scena u Tuzlanskom kantonu

Najžešće nadmetanje između SDA i SDP

Stranka za BiH i Patriotski blok BOSS-SDU pokušaće bar malo pomrsiti račune prvim favoritima

TUZLA - *Ne daj da stoka vlada!!! Izadi, IZBORI se!* To je naslov predizbornog plakata koji se pojavio u Tuzli. U potpisu je izvjesna organizacija *Revolt*, za koju se dosad nije znalo.

Predizborna scena u Tuzlanskom kantonu zaista je šarena poput stada. Na listama ima čestitih građana, ali i “svega i svačega”. Po brojnosti kandidata, konkurencija je velika. Za zastupnička mjesta u Skupštini TK 24 stranke su prijavile oko 600 kandidata. Izvjesni **Ahmet Halilović** je nezavisni kandidat za isti zakonodavni nivo. Po prvi put se u Kantonu nadmeću SDS, koja ide sa jednim kandidatom **Vladimirom Gajićem**, te SNSD sa listom od 18 kandidata, koju predvodi **Miomir Trakilović**. Možda je zanimljivo i to da DNZ i Narodna bošnjačka stranka, na ovom nivou vlasti idu u borbu sa po samo dva kandidata.

Uz dužno poštovanje svih stranaka i kandidata, opća je ocjena da će na svim nivoima najžešća konkurencija biti između SDA s jedne, SDP druge strane, dok će Stranka za BiH i Patriotski blok BOSS-SDU pokušati bar malo pomrsiti račune prvim favoritima. Osim spomenutih stranaka zasad je najaktivnija NS Radom za boljitak.

Prije nego što je zvanično počela predizborna kampanja, kantonalni odbori SDP na čelu sa **Denisom Bećirovićem** i NS Radom za boljitak sa **Mersedom Šerifovićem**, često su ukazivali na katastrofalne ekonomske pokazatelje - povećanje gubitaka i enorman rast nezaposlenosti. Zbog toga su tražili odgovornost Vlade TK i premijera **Bajazita Jašarevića**, ali... Vlada i premijer ne demantiraju citate dvije spomenute stranke, niti obrazlažu zašto je takvo stanje. U pojedinim situacijama uglavnom koriste “svoju” RTVTK, na kojoj učtivo poručuju građanima

Minusi za “vladajuće”

Osim stranačkih prepucavanja, biće i žestoke personalne konkurencije. Na listama su kandidati koji se dovode u vezu sa transferom dionica državnih preduzeća privatnicima u *Tuzlanskoj banci*, propašću preduzeća, neizvršavanju obaveza pre-

ma boračkoj populaciji i socijalnim slučajevima. U tim slučajevima, “vladajući” su u nepovoljnijem položaju. Opozicija zamjera Vladi TK što je ovaj prostor ekonomski sve siromašniji, a administracija zaposlena u organima vlasti sve bolje situirana.



Poziv biračima sa Revoltovog plakata

Bosovci

Predizbornoj političkoj sceni temperaturu će sigurno podići kandidatura **Mirnesa Ajanovića**, za člana Predsjedništva BiH, pojava **Mehmeda Žilića**, kao nosioca liste SBiH u izbornoj jedinici tri, te također ista uloga **Fatmira Ali-spahića** u bloku BOSS-SDU za državni i **Faruka Balijagića** za federalni Parlament.

“da ne može ništa biti bolje”. Obćenja prije prošlih izbora o aktiviranju rada Tvornice voća u Čelincu, TTU, Fabrike sode i još nekih firmi, više malo ko i pominje. Dio većih sistema, kao KHK, *Polibem* i još ne-

ki su pronašli strateške partnere, a u zadnji čas valjda i Fabrika sode. Problem je što i iza tih aranžmana ostaju izvjesni “repovi”, a sudska registracija Fabrike sode, zbog nekih problema, još je upitna.

Sa takvim ekonomskim procesima počinje kampanja za nove izbore. SDA je objektivno u nevolji jer njeni partneri SBiH i HDZ, pa i BOSS koji ih je u ključnim pitanjima podržavao (povjerenje Vladi i ministrima, prihvatanje raznih izvještaja i slično), sada svu krivnju žele da prebace na SDA. Na taj način pomažu SDP, kojeg također smatraju opstruktivnim faktorom u političkoj svakodnevnici Kantona.

Vehid JAHIC

Još jedan mirni protest u Sarajevu

Dosta! predizbornim lažima i potpirivanju mržnje

Aktivisti pokreta *Dosta!* u subotu su na Trgu oslobođenja / Alija Izetbegović u Sarajevu, nakon određene ljetne pauze, ponovo organizovali mirni protest. Ovaj put pod nazivom *Stop nasilju, predizbornim lažima i potpirivanju mržnje!*

Protest je, kako nam je rekao **Sanjin Bužo** iz pokreta *Dosta!*, reakcija aktivista na prljavu i ratnohuškašku kampanju koju trenutno vode skoro sve političke stranke u BiH.

“Javno poručujemo svim političkim partijama da, u ime građana, smjesta prestanu sa ovakvim separatističkim načinom vođenja predizborne kampanje. Umjesto da

građanima predoče programe o zapošljavanju i poboljšanju životnih uslova, oni skreću pažnju sa ovih problema na problem nacionalnog pitanja”, dodao je Bužo.

Aktivisti su poručili i građanima da ozbiljnije obrate pažnju na poruke političara, koje trenutno nisu u interesu stanovnika BiH, naprotiv, kažu, njihove političke poruke su protiv mira, slobode i blagostanja u društvu.

Demir Mahmutćehajić, aktivist pokreta, rekao nam je da nije zadovoljan odzivom građana u proteklom periodu, te da se nada da će u budućem periodu to biti bolje. Pasivnost građana objašnjava time što

je, kako kaže, narod više i oguglo na bilo kakva dešavanja i proteste, ne vjerujući više nikome. Vrijeme će, kaže, pokazati da su njihove inicijative za bh. narod i za ovu državu.

U sklopu jučerašnjih protesta kolektiv *Hrana, a ne oružje* besplatno je dijelio hranu socijalno ugroženim ljudima, kojih je u centru grada na taj dan bilo začuđujuće mnogo. Dva lonca hrane podijeljena su u roku od 15 minuta.

Kako saznajemo, u toku je i akcija prikupljanja školskog pribora za djecu iz porodica slabijeg materijalnog stanja. Građani svoj doprinos mogu dati slijedeće subote ispred zajedničkih institucija u Sarajevu. A. DUČIĆ